

AKASHVANI AIZAWL

HEADLINES

- Tunhnai Raw Thing Tam avanga sazu puang chungchanga hmalakna te Agriculture Minister Pu PC Vanlalruata kaihhruaia thlrho a ni.
- Dampa Assembly bial By-Election a hman tur Electoral Roll kimchang vawiina tihchhuahah voter 20790 an awm.
- Bihar Assembly inthlan tur atana Electoral Roll chu vawiin khan Election Commission in a tlangzarh
- Vietnam-a Typhoon Bualai tleh avanga chhiatna thlenah mi 19 an thi tawh



AGRI MINISTER

Tunhnai Raw Thing Tam avanga sazu puang chungchang sawiho turin vawiin khan Agriculture & Farmers’ Welfare Department Minister Pu PC Vanlalruata chuan a office-ah department official pawimawh te a ko khawm a; district hrang hranga hmalakna kal mek te thlrhoin, hmalak zel dan tur te ngaihtuahin inkawm hona hun hman a ni.

Raw Thing Tam avanga sazu puang hi hriat theih chinah khaw 138 velin harsatna an tawk mek a, Agriculture Department chuan DAO kaltlangin, farmer te hnenah sazu tur—bromadiolone, zinc phosphide te tam tham tak a sem tawh a, sem tur hmabak pawh eng emaw zat a la awm a ni. Sazu puang nasatna khuaah te chuan VC te nen tangkawpin department chuan sazu hrai hlum hna a kalpui mek bawk.

Meeting-ah hian Agriculture & Farmers’ Welfare Department Secretary Pu Ramdinliani; Director Pu R Lalnunzira te leh officer dang eng emaw zat an tel a ni.



GST

Consumer Activist Pu Lallunghnema, Centre For Consumer Education Chairman ni bawk chuan sorkar laipuiin GST rate thar a kalpui chu consumer-te tan malsawmna a nih thu sawiin, dawrkai leh sumdawngte chu GST dan thar hi zawm ngei turin a ngen.

Akashvani zawhna chhangin Pu Lallunghnema chuan, sorkar laipuiin GST dan thar India ram puma hman tura a ruahman chu mipui (consumer)-te tan thil lawmawm tak a nih thu a sawi a; sumdawwna bungrua tam zawk chu a mante pawh tlawm tur leh hniam tura ngaih a nih thu sawiin, hemi in a nghawng tur chu consumer-te an nih thu a sawi.

Pu Lallunghnema chuan GST thar hi mipui tana malsawmna a nih ngei theih nan Centre For Consumer Education chuan theihtawpin sorkar hmalakna an tawiawm dawn tih a sawi a. Sairang thlenga rel kawng hawn a nih tâk avangin Mizorama lo lut bungrua chi hrang hrang man pawh tlahniam tura ngaih a nih laiin bungrua engemaw zat rel lo luh hma ang thoa a man rate tihsan a nih thu a sawi a; sumdawng leh dawrkai tu pawh an bungraw man tisang lo tur leh MRP aia sang a thil hralh lo tur te, bûk tling lo zuar lo tur te, bungrua expire tawh zuar lo tur te, bungrua hman tlak loh leh ei tlak loh kawl lo tur leh zuar lo turin sumdawng zawng zawng an ngen bawk a ni.

Sorkar laipuiin GST chhiah a tih hniamna, GST 2.0 chu Lungleia dawrkai tam tak chuan anihna tak an la hrechiang lo tih an sawi a, Civil Hospital Lunglei Canteen dawr neitu Pi C. Ramdingliani chuan GST 2.0 kalpui ani tih chu an hria a, mahse engtinge an tinhniam dan tur leh engtia kalpui tur nge tih tak an la hre lo a ti a. Khawi atang maha chiangtaka hrihfiahna an la dawn loh thu leh anmahni mai chuan Tax return emaw thil dang neuh neuh hriatthiam loh an la ngah tih a sawi a, Invoice pawh an pek chhuah ngai loh thu a sawi.

Hetihruah hian Tax pek chu khua leh tui an nihna anga an tih tur a ni a, tax pek a hreh lo tih sawiin GST a hniam avang hian an tan hlohna a awm dawn lo tih chu a pawm dan a ni tih a sawi bawk.

Dawr kai tam zawk erawh in Agent te hnen atanga la chhawng an nih ve avangin GST tih kher leh Invoice pek chhuah chu enge a tangkaina tih chu kan CORR in zawhna a dawn tam ber a ni.

<><><>

DAMPA FINAL ROLL

Dampa Assembly bial By-Election a hman tur Electoral Roll kimchang chu waviin khan District Election Officer Pu K.Laltlawmlovan a tlangzarh.

Final Electoral Roll ah hian Vote nei zawng zawng Mipa 10605 leh hmeichhia 10185 an vaiin 20790 an ni a, Draft Roll atanga vote nei punna ni 385 a ni.

Pu K.Laltlawmlova chuan India khua leh tui dik tak, kum tling chin, Roll-a chuang te'n, khua leh tui an nihna anga an chanvo an hlen theih nan, an aiawha rorel tur thlang turin Dampa bial By-Election ah vote thlak theuh turin a sawm a ni.

Final Roll tlangzarh takah hian Polling Station 41 awmin, Polling Station Pakhat zelah Elector 507 awm ang an ni a. Voter tlemna ber hi Zopui Polling Station niin Voter 30 an awm a, Voter tamna ber hi Silsury -I Polling Station a ni a, Voter 1103 an awm a. Service Voter hi 115 a awm bawk a ni.

Dampa Assembly bial Final Electoral Roll tlangzarh tak hi Pu K.Laltlawmlova, District Election Officer chuan Political Party aiawhte hnenah a hlan nghal a ni.



SWASTH NARI

Rampuma hman mek SWASTH NARI, SASHAKT PARIVAR ABHIYAAN - Health Camp runpui neih mek ah Zoram Medical College & Hospital, Falkawn hnuaia Dept. Of Community Medicine te leh MRHRU, Aibawk te tangkawp buatsaih in, Aibawk khuaah Health Camp neih a ni a.

He health camp ah hian Family Adoption Programme hnuaia ZMC a MBBS Zirlai te'n Aibawk khuaa an chhungkua adopt te leh enkawl te an hruai khawm a ni.
MRHRU, Aibawk hnuaia Chhungkaw thlan bik te pawh he Health Camp ah hian test hrang hrang tih sak a ni.

In entir tura lo kal zawng zawng te tan BP, Rih zawng leh san zawng te en sak an nih bakah, Zunthlum leh Thisen test sak an ni a, TB screening te neih niin Xray ngai te tan chuap Xray sak nghal an ni bawk a, Damdawi te a thlawn veka sem a ni bawk.

Health Camp ah hian Aibawk PHC Doctor leh staff te pawh in an tawiawm bawk ani.

Damlo in entir zawng zawng hi mi 240 niin, ZMC&H Doctor engemawzat leh Aibawk PHC MO te'n damlo te hi an en a ni.



LOK KAYAL MELA

Vawiin khan Champhaiah Lok Kayal Mela leh PM Awas Mela Shehri -Street Vendors loan leh In sak tanpuina)Special Campaign neih a ni a, Champhai Bawrhsap Pu Mohammad Aaquib chuan khuallian niin a hmanpui a, Champhai DUDO Pu Ngulzathuama'n Campaign hun a kaihruai a ni.

Lok Kayal Mela leh PM Awas Mela Shehri Special Campaign hi mipuiten Sorkar hmalakna an lo hmelhriat a, hamthatna an dawn theih te an hriat a, an hman tangkai theihna tura Ministry of Housing & Urban Affairs, Govt of India hmalakna a ni. Lok Kayal Mela hi PM SVANidhi hnuaia kalpui a ni a, khawpuia chhungkua eizawna ngelnghet neilo, kawngkama in pho thin ten an chhungkaw dinhmun an lo sawhngheh theihna tura Loan pung tlem zawk hmanga an hmalak pui a ni. PM Awas Mela Shehri hi Angikaar Campaign hnuaia kalpui niin khawpuia cheng In leh lo neilo te leh In sa mek ten Sorkar puihna a chenna in an din theihna tur atana hmalakna a ni.

He hunah hian Lead District Manager Pu Lawmkima chuan thu sawiin, Sawrkar laipui chuan India ram pumpui economy tih hmasawn a tum avangin hma nasa takin a la mek a, State Bank of India pawhin sawrkar hnathawk lo te tan Housing Loan Scheme thar AASHRAY Home Loan a duang a ti a, he loan hi kum 1 chhunga cheng nuaih 6 la lut tling lote tan duan niin cheng nuaih 20 thleng an lak theih tur thu a sawi bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BIHAR E ROLL

Bihar Assembly inthlan tur atana Electoral Roll chu vawiin khan Election Commission in a tlangzarh. Tun hnaiah Special Intensive Revision campaign neih anih hnuah August ni 1 khan draft roll tihchhuah a ni a. Kan Correspondent sawidanin kum 2024 Lok Sabha inthlanah khan Bihar ah hian voter vaibelchhe 7.89 an awm a. SIR campaign neih anih hnuah voter nuai 65 chuang paih an ni a. Heng mite hi mitthi tawh te, hmundanga insawn tawhte leh a lema lo inthunte an ni a. Hetihlai hian Congress-Rashtriya Janata Dal tangrual pawlte chuan voter hming paih hi an duh loh thu sawiin lungawilohna an lantir a n.

<><><>

SEVA PARV

Mipui rawngbawl leh sawrkar inrelbawltha thupuia neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv hunah chuan PM Modia hnuaia New Education Policy 2020 in zirna kalphung a siamthat dan tarlang ila. Kum 2020 June thla khan Prime Minister Modia chuan New Education Policy hi a rawn puangzar a. Kum 34 hnuaah policy thar an siam leh anih thu sawiin ramchhunga zirna kalphung siam tha tur leh kum zabi 21 mil tura siamrem anih thu a sawi a. Pu Modia chuan mitin tana zirna tha pek chu an tum ber anih thu a sawi.

NEP 2020 ah hian zirlai thiamna bakah kut themthiamna lam tih hmasawn chu a tum pakhat a ni a. Eizawna tlak thiamthil zirtir chu a tum a ni.

<><><>

VIETNAM

Vietnam-a Typhoon Bualai tleh avanga chhiatna thlenah mi 19 an thi tawh a. Mi 88 in hliam an tuar. Tun dinhmunah mi 13 chu chin hriatlohin an bo a. Chenna in nuai 1 leh sang nga chuang thlipui in a nuai chhia a ni.

<><><>